

NOS MORTS

En memoria d'Ulrich Berther-Monn, Camischolas



Ils 13 da decembre 1971 ha il zenn grond dalla baselgia parochiala da Sedrun annunziau cun tun lamentond la mort anetga da nies convischin Ulrich Berther-Monn a Camischolas.

Per resumar cuortamein —ord engrazieievladad — las staziuns da siu viadi terrester, stuein nus star in mument eri. — Aunc adina vala il proverbi: «Oz en possa, damaun en fossa». — Quei vala per giuven e vegl. Igl aungel dalla mort ha clamau nies car permiert gliendisdis, ils 13 da decembre 1971, suentermiezdi, amiez sia lavur quotidiana. Ins sa s'imaginar tgei frida che quei ei stau per ils ses.

Buca ch'igl Ulrich fuss buca staus pinaus da render sia olma a siu suprem scaffider. El ha astgau mirar en fatscha alla freida mort cun ina olma bein preparada e cargada da grondas grazias per il s. parvis. El veva biabein 67 onns. Ei sedi adina puspei ch'ils buns originals — quellas personalitads cun agen mein e giudezi — mierien ora. In tal original el meglier senn dil plaid, ha senza dubi il Signur sur veta e mort clamau quei gliendisdis tier el.

Ulrich Berther ei staus in um cun lingia. Quellas lingias gradas ein adina bialas e surveiseivlas, era sch'ils cantuns san forsa ina ga u l'autra esser empau gits. El era in um che sedistingueva en tut siu far e demanar. El veseva e mirava era anavon. Mo buca adina saveva el ira d'accord cun nies temps modern. E buca per nuot ha el giu detg differentas gadas al munglus sribent da quest necrolog, nua che tut quei mein a

in di. —? E segir, cun ina certa raschun. El era pur suveran da num e da pum, attaschaus al tschespet patern. A quel eis el staus fideiveis tochen il pli davos mument. Sco incarnau pur, loschs da sia clamada e zun activs en quella, ha el mussau, ch'il menaschi puril detti paun e ponns a quel che manischescha siu fatg cun tschaffen e capientscha, cun perseveronza ed optimissem. El veva gronda exactedad viers sesez, e quei preterideva el era dils auters.

Il sribent da questas lingias ha enconuschiu il defunct avon varga 30 onns. Il preziau defunct ei naschius a Camischolas, ils 31 da matg 1904 sco secund fegl dils geniturs, vegl president Gion Andriu e Barla Berther-Berther. El ei carschius si ensemen cun ses fargliuns. Ils 18 da fevrer 1936 ha el menau sia cara e futura consorta en sia biala casa nova, ch'el veva giu baghegiau. Ei era giuvna Nescha Monn, feglia ord l'emprema lètg da deputau e president Gion Felici Monn, Camischolas. Quater affons ein vegni schenghegiai a quella lètg, ina buoba e treis buobs.

Mo cul tschunavel affon ha il car defunct piars gia il fevrer 1942 sia cara consorta ed affon. Ina plaga ch'ei segiramein mai meglurada. Mo el ei buca semess a bandun ensemen cun sia cara sora Maria ha el priu tut ord il maun da Diu, ei seremess en sia sort. Gie, la buna onda Maria ei stada ina buna mumma per quels quater orfans, restai anavos senza mumma. —

Ulrich era in um pietus e da tema da Diu. Cun lavur ed oraziun ha el tratg si, ensemen cun sia sora quels pignets, ils quals ein oz engrazieievls alla onda e buna Maria. Il comiau d'in bien bab, aschi anetg sto far mal a mintga cor human cun sentiment per il concarstgaun. Ina plaga che meglura plaun, forsa mai. Al sribent ha el aunc detg ils 6 da decembre. «Oh, cun mei va ei bein, giavischel a Ti tut bien e sin seveser». —

Mo jeu vajel buca viu el pli vivs cura che hai stuiu endriescher sia mort, sun staus trests. Denton, las vias dil Segner ein buca las nossas. Nus sperein da seveser tut leusi enta parvis.

Nus condolein da cor als ses, restai anavos, e giavischein al car defunct, ch'el hagi retschiert la pagaglia meritada leusi tier ils beai per tut sias stentas e cruschs. La glisch perpetna sclareschi ad el ed a nos cars defuncts. Nus vegnin a salvar igl Ulrich en buna memoria. R.I.P. G.F.